

ceux qui se presentoient. Allez, mes chers amis, leur dis-je, retirez-vous, autrement la maladie vous pourra esgorger: l'amour que ie vous porte me fait vous donner ce conseil; ne vous esloignez pas neantmoins beaucoup, afin que nous puissions auoir de vos nouvelles, ils me promirent de m'obeïr de point en point, & là dessus se r'embarquent & s'en vont, me nommant le lieu où ils se retireroient. Cela [84] fait, ie m'en vay dire à toutes les autres Familles arrestées aupres de nous, qu'il feroit bon qu'il s'esloignassent pour vn temps; Ie ne sçay pas quels estoïent les mouemens de mon ame, mais ie sçay bien que Dieu ne veut pas que le cœur de l'homme s'attache à quoy que ce soit. Ayant donc chassé, pour ainsi dire, & banny pour vn temps ces pauvres brebis bien desolées, le Pere Vimont qui nous estoit venu voir à Sillery, & moy & vn ieune Sauvage, prenons nostre malade dans vn canot, & le portons en la maison de charité & de misericorde, c'est à dire, à l'Hospital, si tost qu'il fut placé ie m'approche du liêt de François Xauier, & le voyant en vn tres-pitoyable estat, ie me couure la face de mon mouchoir, & m'appuye la teste sur son cheuet sans luy pouuoir parler.

Ceux qui trauaillent au salut des ames, ont des tendresses pour leurs Neophytes aussi bien que les meres pour leurs enfans. Ce bon Sauvage vrayement Chretien, se tournant vers moy, me dit; Nikanis, ne t'attriste point, ie meurs fort volontiers, ie ne crains point la mort, ie m'ennuye sur la terre, i'espere que i'iray au Ciel: Ie vous laisse à penser si ces paroles me perçoient [85] le cœur, le voyant fort oppressé: ie prie nos Peres qui estoient presents de luy apporter le sainct Viatique, pendant qu'on l'alloit querir, ie